

REGLUR

193

13. nóv.

um félagsheimilið Innstaland, Skarðshreppi, Skagafjarðarsýslu.

1. gr.

Nafn: Félagsheimilið Innstaland, Skarðshreppi, Skagafjarðarsýslu.

Lóðin er gefin af Sigurði Sigurfinnssyni og Stefáni Sigurfinnssyni, Meyjarlandi. Lóðarstærð 1040 ferm. Eigandi félagsheimilisins er Skarðshreppur í Skagafjarðarsýslu.

2. gr.

Þriggja manna húsnefnd, kjörin af hreppsnefnd árlega, stjórnar félagsheimilinu. Varamenn skulu kjörnir á sama hátt. Húsnefnd skiptir sjálf með sér verkum. Hún skal halda nákvæma gerðabók um störf sín. Ef félagsheimilið hættir störfum, skal afhenda þjóðskjalasafni gerðabækur þess til vörzlu.

3. gr.

Húsnefnd heldur fund er þurfa þykir. Skylt er henni að halda fund, ef $\frac{1}{3}$ nefndarmanna æskja. Aðalfundur félagsheimilisins skal vera ár hvert. Til aðalfundar skal boða á sama hátt og reglulegs hreppsnefndarfundar. Aðalfundur er löglegur, ef meiri hluti hreppsnefndarmanna sækja hann. Hreppsnefndarmenn einir hafa atkvæðisrétt, en húsnefnd hefur rétt til fundarsetu með málfrelsi og tillögu-rétti. Á fundinum skal húsnefnd leggja fram rekstrar- og efnahagsreikning félagsheimilisins fyrir síðastliðið ár, endurskoða af endurskoðendum sveitarsjóðsreikninga eða löggiltum endurskoðanda. Einnig leggur hún fyrir fundinn fjárhagsáætlun fyrir félagsheimilið á yfirstandandi ári. Fjárhagsáætlun skal gerð svo nákvæm sem unnt er. Eigi má efna til verulegra útgjalda, nema samþykkt hafi verið á aðalfundi eða aukafundi. Gildir þetta jafnt um rekstrargjöld og stofnkostnað. Reikningum og fjárhagsáætlun skal bera undir atkvæði fundarmanna. Afrit af ársreikningum félagsheimilisins skal senda félagsheimilásjóði. Félagsheimilið skal rekið sem sjálfstæð stofnun með sérstöku reikningshaldi. Almanaksárið skal vera reikningsár þess.

4. gr.

Aðalverkefni húsnefndar eru:

- að ráðstafa félagsheimilinu til afnota fyrir eiganda og aðra;
- að ákveða gjöld fyrir afnot hússins;
- að annast kaup nauðsynlegra tækja og áhalda;
- að sjá um viðhald og endurbætur húseignar, húsbúnaðar og áhalda;
- að sjá um, að ræsting félagsheimilisins (húss og lóðar) sé jafnan í góðu lagi og að gætt sé ýtrasta hreinlætis í umgengni;
- að sjá um, að húsið sé hæfilega hitað og lýst;
- að sjá um, að löggæzla sé á samkomum, ef þess er þörf.

5. gr.

Eigandi félagsheimilisins skal eins og aðrir greiða leigu fyrir afnot hússins.

Skylt er honum að heimila félögum, er greinir í 1. gr. laga nr. 77/1947, um félagsheimili, innan sama byggðarlags, afnot af húsinu gegn hæfilegu gjaldi, ef eigi fer í bága við eðlilega þörf eiganda sjálfs fyrir húsið.

Verði ágreiningur um, hvort önnur félög eigi rétt á afnotum af félagsheimilinu, sker fræðslumálastjóri úr, en úrskurði hans má skjóta til menntamálaráðuneytisins.

193

13. nóv.

6. gr.
Leiga fyrir afnot félagsheimilisins skal ákveðin svo há, að nægilegt fé fáiast til þess að inna af höndum nauðsynleg gjöld, ef stofnuninni koma eigi aðrar tekjur.

7. gr.

Þess skal gætt, að húseignir, áhöld, húsbúnaður allur og fatnaður sé jafnan hæfilega vátryggt.

8. gr.

Félag, er samkomu heldur í félagsheimilinu, skal hafa þar gæzlumann af sinni hálfu. Gæzlumaður skal er samkomu lýkur, ganga örugglega frá hitunartækjum, koma húsbúnaði og áhöldum á sinn stað, koma óskilamunum í örugga vörzlu, slökkva ljós og loks loka vel gluggum og hurðum.

9. gr.

Að lokinni hverri notkun félagsheimilisins skal húsnefnd sjá um ræstingu þess, þ. á m. að gólf sé þvegin úr sápuvatni og salerni hreinsuð vandlega með sótt-hreinsandi efni. Árlega skal fram fara gagnger ræsting alls hússins.

10. gr.

Ganga skal þannig frá lóðinni umhverfis félagsheimilið, að auðvelt sé að halda henni snyrtilegri, og skal húsnefnd sjá um, að hún sé jafnan vel hirt. Lóðina skal girða traustri, gripheldri girðingu, er vel sé haldið við.

11. gr.

Fánastöng skal koma fyrir á húsinu eða við það. Hún skal vera traustlega fest og máluð hvít. Húnn og snerill mega þó vera í öðrum lit. Fánasnúran skal ávallt vera heil. Stöngin skal vera í tveim hlutum, þannig að auðvelt sé að fella hana, t. d., ef skipta þarf um snúru eða mála stöngina. Þess skal vandlega gætt að nota einungis fána með réttum litum og hlutföllum.

12. gr.

Árlega skal athuga húeignina alla vandlega með viðgerð fyrir augum.

13. gr.

Skemmdir á húseign, áhöldum og húsbúnaði umfram eðlilegt slit skulu þeir bæta, er spjöllum valda.

14. gr.

Í félagsheimilinu má hvorki veita áfengi né neyta þess. Húsnefnd getur svipt þá, er gegn þessu brjóta, aðgangi að félagsheimlinu tiltekinn tíma.

15. gr.

Reglur þessar, sem settar eru með skirskotun til 8. gr. laga nr. 77 5. júní 1947, um félagsheimili, öðlast gildi þegar menntamálaráðherra hefur staðfest þær.

Reglur þessar, sem stjórn félagsheimilisins Innstaland hefur samið og samþykkt, staðfestast hér með samkvæmt 8. gr. laga nr. 77 5. júní 1947, um félagsheimili, til þess að öðlast þegar gildi, og birtast til eftirbreytni öllum þeim, sem hlut eiga að máli.

Í menntamálaráðuneytinu, 13. nóvember 1951.

Björn Ólafsson.

Birgir Thorlacius.